

Persisi galak silat untuk bukan Melayu

- 4 JAN 1989

Juga cuba hidupkan perguruan lama

PERSEKUTUAN Silat Singapura (Persisi) sedang berusaha untuk menggalakkan lebih ramai peserta silat bukan Melayu mengambil bahagian di samping menghidupkan kembali beberapa perguruan silat yang telah lama 'mendiamkan diri'.

Satu cara untuk menarik lebih ramai bukan Melayu menyertai seni mempertahankan diri itu ialah dengan mengadakan lebih banyak pertunjukan silat dari masa ke masa.

Menurut Penolong Setiausaha Agung I Persisi, Encik Mohd Khamin Said: "Kami akan mengadakan lebih banyak pertunjukan silat dari masa ke masa untuk menarik peserta bukan Melayu."

Dalam pertunjukan serupa itu, perguruan-perguruan yang telah lama 'mendiamkan diri' akan turut diundang untuk mengambil bahagian. Pertunjukan pertama akan diadakan Sabtu

ini dalam satu majlis di Pusat Jawatankuasa Penduduk (RC) Boon Teck Zon E di Blok 207, Toa Payoh North.

Menurut Encik Mohd Khamin lagi, semua perguruan yang berdaftar dengan Persisi telah diundang untuk membuat persembahan tersebut.

Sebanyak 18 perguruan kini bernaung di bawah Persisi termasuk empat perguruan silat yang dihidupkan kembali iaitu Silat Harimau, Sendeng Jaya Putra, Gagak Sakti dan Macan Pasrah.

Kembalinya keempat-empat perguruan silat itu merupakan acara kemuncak pada malam itu.

Anggota Parlimen (AP) bagi Kawasanundi Perwakilan Kumpulan (GRC) Toa Payoh, Dr Ho Tat Kin, dijangka hadir sebagai tetamu terhormat. Presiden Persisi, yang juga AP bagi GRC Bedok, Encik Ibrahim Othman,

juga dijadualkan hadir.

Menerangkan sebab empat perguruan itu diwujudkan semula, Encik Mohd Khamin berkata, ia diperlukan bagi membantu mengembang dan memperbanyakkan lagi aliran silat setempat.

Ia juga akan dijadikan sebagai tenaga tambahan untuk memperhebat kegiatan silat di sini dan juga ke pertandingan-pertandingan luar negeri.

"Setiap aliran mempunyai keistimewaan yang tersendiri dan kita harus mengembang-kan apa yang terbaik untuk para pesilat," katanya.

Beliau menambah, jawatankuasanya sedang berusaha untuk menghidupkan kembali lebih banyak perguruan lain yang sudah lama tidak aktif. Kesemua perguruan tersebut akan bergiat sama ada di balai-balai rakyat atau kawasan sekitar pejabat RC.